

中國古典文學珍藏大系



唐詩

【編 張 偉】

【貳】



吉林攝影出版社

中国古典文学珍藏大系

唐 诗

【第二卷】

吉林摄影出版社

唐诗卷中

李绅诗选

李绅，字公垂，润州无锡人。为人短小精悍，于诗最有名，时号短李。元和初，擢进士第，补国子助教，不乐，辄去。李锜辟掌书记，绅抗命，不为草表，几见害。穆宗召为右拾遗、翰林学士，与李德裕、元稹同时号三俊，历中书舍人、御史中丞、户部侍郎。敬宗立，李逢吉构之，贬端州司马，徙江州长史，迁滁、寿二州刺史，以太子宾客分司东都。太和中，擢浙东观察使。开成初，迁河南尹、宣武节度使。武宗即位，召拜中书侍郎同平章事，进尚书右仆射，封赵郡公。居位四年，以检校右仆射平章事节度淮南。卒，赠太尉，谥文肃。《追昔游诗》三卷，《杂诗》一卷。今合编为四卷。

南梁行

江城郁郁春草长，悠悠汉水浮青一作清光。杂英飞尽空昼景，绿杨重阴官舍静。此时醉客纵横书，公言可荐承明庐。元和十四年，故山南节度仆射公奏观察判官，蒙以书奏见委，常戏拙速。青天诏下宠光至，颁籍金闺征石渠。是岁五月，蒙恩除右拾遗。秣归山路烟岚隔，山木幽深晚花拆。涧底红光夺火燃，摇风扇毒愁行客。骆谷中多毒树，名山琵琶，其花明艳，与杜鹃花同。樵者识之，言曰：早花杀人。杜鹃啼咽花亦殷，声悲绝艳连一作怜空山。斜阳瞥映浅深树，云雨翻迷崖谷间。山鸡锦质矜毛羽，透竹穿萝命俦侣。乔木幽壑上下同，雄雌不

惑一作异飞栖处。望秦峰回过商颜，浪叠云一作波堆万簇山。行尽杳冥青嶂外，九重钟漏紫云间。元和列侍明光殿，谏草初焚市朝变。北阙趋承一作臣半隙尘，南梁笑客一作吟啸皆飞霰。追思感叹却昏迷，霜鬓愁吟到晓鸡。故篋岁深开断简，秋堂月曙掩遗题一作桂。呜呜晓角霞辉粲，抚剑当应一作楹一长叹。刍狗无由学圣贤，空持感激一作射终昏旦。

趋翰苑遭诬构四十六韵

九五当乾德，三千应瑞符。纂尧昌圣历，宗禹盛丕图。穆宗正月登位。画象垂新令，消兵易旧谟。选贤方去智，招谏忽升愚。穆宗听政五日，蒙奋发除右拾遗，与淮南李公，召入翰林也。大乐调元气，神功运化起。脱鳞超沆漭，翻翼集蓬壶。捧日恩光别，抽毫顾问殊。凤形怜采用，笔，龙颌借骊珠。掷地声名寡，摩天羽翮孤。洁身酬雨露，利口扇谗谀。碧海同宸眷，鸿毛比贱躯。辨疑分黑白，举直仕朋徒。思政面论逢吉、崔植奸邪，刘栖楚、柏耆凶险，张又新、苏景修朋党也。庭兽方呈角，阶蓂始效蓂。日倾乌掩魄，星落斗摧枢。穆宗升遐。坠剑悲乔岳，号弓泣鼎湖。乱群逢害马，择内纵狂并。逢吉、守澄、栖楚、柏耆、又新等：连为噬之徒。胆为堕肝沥竭，心因沥血枯。满帆摧骇浪，征棹折危途。余以户部侍郎贬端州司马。燕客书方诈，尧门信未孚。敬宗即位之初，遭逢吉等诬构，宸襟未察，衔冤遂深。谤兴金就铄，毁极玉生痡。砺吻矜先搏，张罗聘疾驱。余遭逢吉构成逆，敬宗听政之前一日，宣命于月华门外窜逐。地嫌稀魍魎，海恨止番禺。栖楚等见逢吉，怒所贬太近。瘴岭冲蛇入，蒸池蹶虺趋。望天收雪涕，看镜揽霜须。草毒人惊剪，茅荒室未诛。火风晴处扇，山鬼雨中呼。穷老乡关远，羁愁骨肉无。鹊灵窥牖户，龟瑞出泥途。余到端州，有红龟一，州人李再荣来献，称尝有里人言，吉征也。余放之于江中，回头者三四，游泳前后不去久之。又南中小鹤，名曰蛮鹤，形小如燕雀。里中言：此鸟不常见，至而鸟舞，必有喜应。是日与龟同至于馆

也。烟岛深千瘴，沧波淼四隅。海标传信使，江棹认妻孥。到接三冬暮，来经六月徂。暗滩朝不怒，惊濑夜无虞。从吉州而南，历封康，并足湍濑，危险至极。其名有天门、捣钡、霸州等滩，惟江水泛涨，则无此患。康州悦城县有媪龙祠，或能致云雨。余以书祝之，家累以十月溯流，龙为之三涨江水以达也。俯首安羸业，齐眉慰病夫。涸鱼思雨润，僵燕望雷苏。诏下因颁朔，恩移讵省辜。余以宝历元年五月，量移江州长史。诳天犹指鹿，依社尚凭孤。逢吉尚为相。度岭瞻牛斗，浮江淬辘轳。未平人睚眦，谁惧鬼揶揄。盆一作湓浦潮通楚，匡山地接吴。庾楼清桂满，远寺素莲敷。仿佛皆停马，悲欢尽隙驹。旧交封宿草，沈八侍郎、武十五侍郎、元九相公、庞严京兆、蒋防舍人皆为尘世。衰鬓重生白。万戟分梁苑，双旌寄鲁儒。骯骯移岁月，冉冉近桑榆。疲马愁千里，孤鸿念五湖。终当赋归去，那更学杨朱。

忆夜直金銮殿承旨

月当银汉玉绳低，深听箫韶碧落齐。门压紫垣高绮树，阁连青琐近丹梯。墨宣外渥催飞诏，草布一作定深一作新恩促换题。明日一作惟我独归花路远一作近，可怜人世隔云霓一作泥。

忆春日曲江宴后许到芙蓉园

春风上苑开桃李，诏许看花入御园。香径草中回玉勒，凤皇池畔泛金樽。绿丝垂柳遮风暗，红药低丛拂砌繁。归绕曲江烟景晚，未央明月锁千门。

过荆门

荆江水阔烟波转，荆门路绕一作远山葱蒨。帆势侵云灭又明，山程背日昏还见。青青梦陇啼飞鸦，寂寞野径棠梨花。行行驱马万里远，渐入烟岚危栈赊。林中有鸟飞出一作幽谷，月上千岩一声哭。肠断思归不可闻，人言恨魄来巴蜀。我听此鸟祝我魂，魂死莫学一

作死勿学此声衔冤。纵为羽族莫栖息，直上青云呼帝阍。此时山月如衔镜，岩树一作岫参差互辉映。皎洁深看入涧泉，分明细见樵人径。阴森鬼庙当邮亭，鸡豚日宰闻膻腥。愚夫祸福自迷惑，魍魉凭何通百灵。月一作日低山晓一作晚问行客，已酹椒浆拜荒陌。惆怅忠贞徒自持，谁祭山头望夫石。

涉沅萧一作湘。注内缺二字

屈原死处潇湘阴，沧浪森森云沈沈。蛟龙长怒虎长啸，山木綵波浪深。烟横日落惊鸿起，山映馀一作云霞杳一作森千里。鸿叫离离人暮天，霞消漠漠深云水。水灵一作虚江暗扬波涛，鼉鼉动荡风骚骚。行人愁望待明月，星汉沈浮岵鬼号。屈原尔为怀王一作忠没，水府通天化灵物。何不驱雷击电除奸邪，可怜空作沈泉一本此下有抱冤二字骨。举杯沥酒招尔魂，月影一作彩滉漾开乾坤。波白一作明水黑山隐见，汨罗之上遥昏昏。风帆候晓看五两，戍鼓遡遡一作郢郢远山响。潮满江津猿鸟啼，荆夫楚语飞蛮浆。潇湘岛浦无人居，风惊水暗惟蛟鱼。行来击棹独长叹，问尔精魄可所如。

逾岭峤止荒陬抵高要

天将南北分寒燠，北被羔裘南卉服。寒气凝为戎虏骄，炎蒸结作虫虺毒。周王止化惟荆蛮，汉武凿远通孱颜。南标铜柱限荒徼，五岭从兹穷险艰。衡山截断炎方北，回雁峰南瘴烟黑。万壑奔伤溢作沱，湍飞浪激如绳直。南人谓水为沱，如原瀑流，自郴南到韶北，有八沱。其名神沱，伤沱，鸡附等沱，皆急险不可上。南中轻舟迅疾可入此水者，因名之沱船，善游者为沱夫。千崖傍从猿啸悲，丹蛇玄虺潜蛟蛇。沱夫拟楫劈高浪，瞥忽浮沈如电随。岭头刺竹蒙笼密，火折红蕉焰烧日。岭上泉分南北流，行人照水愁肠骨。阴森石路盘紫纁，雨寒日暖常斯须。瘴云暂卷火山外，苍茫海气穷番禺。鸬鹚猿鸟声相续，椎髻晓呼同戚促。百处壅滩异雨晴，四时雷电迷昏旭。鱼肠雁足望

缄封，地远三江岭万重。鱼跃岂通清远一作遂峡，雁飞难渡漳江东。余在南中日，知家累以其年九月九日发衡州，因寄云：“菊花开日有人逢，知过衡阳回雁峰。江树送秋黄叶少，海天迎远碧云重。音书断达听蛮鹤，风水多虔祝媪龙。想见病身浑不识，自磨青镜照衰容。”慨然追感，以疏其下。又端州界有清远峡，深险莫测，皆言水府为鱼龙之限也。云蒸地热无霜霰，桃李冬华匪时变。天际长垂饮涧虹，檐前不去衔泥燕。南中虹四时长见，见数则多飓风，燕不归蛰，燕泥多沙。人惧其玷污于人，每逐其巢也。幸逢雷雨荡妖昏，提挈悲欢出海门。西日眼明看少长，北风身醒辨寒温。贾生谪去因前席，痛哭书成竟何益。物忌忠良表是非，朝驱绛灌为讎敌。明皇圣德异文皇，不使无辜困鬼方。汉日一作口傅臣终委弃，如今衰叟重辉光。高明白日恩深海，齿发虽残壮心在。空愧驽骀异一毛，无令朽骨惭一作仍千载。

泛五湖效谢惠连

范子蜕冠履，扁舟逸霄汉。嗟予抱险艰，怵惕惊弥漫。穷通泛滥劳，趣适殊昏旦。浴日荡层空，浮天森无畔。依滩落叶聚，立浦惊鸿散。浪叠雪峰连，山孤翠一作紫崖断。风帆同巨壑，云矗成高岸。宇宙可一作或东西，星辰沈灿烂。霞生颍洞远，月吐青茨乱。岂复问津迷，休为吕梁叹。漂沈自诎保，覆溺心长判。吴越郡异乡，婴童及为玩。依稀占井邑，嘹唳同鹅鹳。举棹未宵分，维舟方日旰。徵斯济川力，若鼓凌风翰。易狎当悔游，临深罔知难。

溯西江

江风不定半晴阴，愁对花时尽日吟。孤棹自迟从蹭蹬，乱帆争疾竞浮沈。一身累困怀千载，百口无虞贵万金。空阔远看波浪息，楚山安稳过云岑。

早 发

沙洲月落宿禽惊，潮起风微晓雾生。黄鹤浪明知上信，黑龙山暗避

前程。火旗似辨吴门戍，水驿遥迷楚塞城。萧索更看江叶下，两乡俱是宦游情。

闻里谣效古歌

乡里儿，桑麻郁郁禾黍肥，冬有襁褓夏有衣。兄锄弟耨妻在机，夜犬不吠开蓬扉。乡里儿，醉还饱，浊醪初熟劝翁媪一作嫂。鸣鸠拂羽知年好，齐和杨花踏春草。劝年少，乐耕桑。使君为我剪荆棘，使君为我驱豺狼。林中无虎山有鹿，水底无蛟鱼有鲂。父渔子猎日归暮一作父子猎归白日暮，月明处处春黄粱。乡里儿，东家父老为尔言，鼓腹那知生育恩？莫令太守驰朱舳，悬鼓一鸣卢鹊喧。恶声主吏噪尔门，唧唧力力烹鸡豚。乡里儿，莫悲咤。上有明王颁诏下，重选贤良恤孤寡。春日迟迟驱五马，留犒投钱以为谢。乡里儿，终尔词。我无工一作却巧唯一作惠无私，举手一挥临路岐。

入淮至盱眙

山凝翠黛孤峰迥，淮起银花五两高。天外绮霞迷海鹤，日边红树艳仙桃。岸惊目眩同奔马，浦溢心疑睹扑鳌。寄谢云帆疾飞鸟，莫夸回雁卷轻毛。

忆至巩县河宿待家累追怀

巩树翻红秋日斜，水分伊洛照馀霞。弓开后骑低初月，鹞驻前旌拂暮鸦。闺信坐迟青玉案，弄儿闲望白羊车。今来忆事凉风晚，烟浦空悲黄一作寒菊花。

宿扬州

江横渡阔烟波晚，潮过金陵落叶秋。嘹唳塞鸿经楚泽，浅深红树见扬州。夜桥灯火连星汉，水郭帆墙近斗牛。今日市朝风俗变，不须开口问迷楼。

早渡扬子江时王璠在浙西

日冲海浪翻银屋，江转秋波走雪山。青嶂迴开蹲虎戍，碧流潜伏跃龙关。地分吴楚星辰内，水迫沧溟宇宙间。焚却戍船无战伐，使知风教被乌蛮。

忆万岁楼望金山

里言金山有龙盘护。《吴志》：金陵虎踞。又云：万岁楼，往年清夜浮于江中，有宿楼者觉之，金锁摩于城上。

楼高雉堞千师垒，峰拔惊波万壑攒。山绝地维消虎踞，水浮天险尚一作上龙盘。蜃嘘云拱飞江岛，鳌喷仙岩隔海澜。长对碧波临古渡，几经风月与悲欢。

过吴门二十四韵

烟水吴都郭，阊门架碧流。绿杨深浅巷，青翰往来舟。朱户千家室，丹楹百处楼。水光摇极浦，草色辨长洲。忆作一作昨麻衣翠，一作日，一作客。曾为旅棹游。放歌随楚老，清宴奉诸侯。贞元中，余以布衣多游吴郡中，韦夏卿首为知遇，常陪宴席段平仲、李季何、刘从周、慕容威十余辈，日同怀酒。及余以太和七年领镇会稽，则当时宾客、群吏、乐徒、寺僧、里客，无一人存者。至于韦公子，凋丧略尽。花寺听莺入，春湖看雁留。里吟传绮唱，乡语认畎讴。桥转攒虹饮一作影，波通斗宛浮。竹扉梅圃静，水巷橘园幽。缝堵荒麋苑，穿岩破虎丘。旧风犹越鼓，餘俗尚吴钩。故馆曾闲访，遗基一作从变遍搜。吹台山木尽，香径佛宫秋。帐殿孤蒲掩，云房露雾收。芡蓂妖覆一作废灭，荆棘鬼包羞。风月俄黄绶，经过半白头。元和七年，余以校书郎从役，再至苏州。时范十五传正为郡，而贞元中宾客散落，半已殂谢。及宴，而伶人酒徒悉往日者。问僧，惟令起二人已疾。重来冠盖客，非复别离愁。太和七年，余镇会稽。刘禹锡为郡，则元和中苏州相识，知与不知，索

然皆尽，河柳衰谢，邑居更易，乃甚令戚之叹也。候火分通陌，前旌驻外邮，水风摇彩旆，堤柳引鸣驺。问吏儿孙隔，呼名礼敬修。顾瞻殊宿昔，语默过悲忧。义感心空在，空衰日易偷。还持沧海诏，从此布皇猷。

灵汜桥

灵汜桥边多感伤，分明湖派绕回塘。岸花前后闻幽鸟，湖月高低怨一作映绿杨。能促岁阴惟白发，巧乘风马是春光。何须化鹤归华表，却数凋零念越乡。

却渡西陵别越中父老

海潮晚上江风急，津吏篙师语默齐。倾手奉觞看故老，拥流争拜见孩提。惭非杜母临襄岷，自鄙朱翁别会稽。渐举云帆烟水阔，杳然凫雁各东西。

苏州不住遥望武丘报恩两寺

秋山古寺东西远，竹院松门怅望同。幽鸟静时侵径月，野烟消处满林风。塔分朱雁馀霞外，刹对金螭落照中。官备散寮身却累，往来惭谢二莲宫。

回望馆娃故宫

江云断续草绵连，云隔秋波树覆烟。飘雪荻花铺涨渚，变霜枫叶卷平田。雀愁化水喧斜日，鸿怨惊风叫暮天。因问馆娃何所恨，破吴红脸尚开莲。

皋 桥

伯鸾憔悴甘飘寓，非向嚣尘隐姓名。鸿鹄羽毛终有志，素丝琴瑟自谐声。故桥秋月无家照，古井寒泉见底清。犹有馀风未磨灭，至今

乡里重和鸣。

却到金陵登北固亭

龙形江影隔云深，虎势山光入浪沈。潮蹙海风驱万里，日浮天堑洞千寻。众峰作限横空碧，一柱中维彻底一本此字缺金。还叱楫师看五两，莫令辜负济川心。

宿瓜州

烟昏水郭津亭晚一作晓，回望金陵若动摇。冲浦回风翻宿浪，照沙低月敛残潮。柳经寒露看萧索，人改衰容自寂寥。官冷旧谙唯旅馆，岁阴轻薄是凉飙。

州中小饮便别牛相

笙歌罢曲辞宾侣，庭竹移阴就一作近小斋。愁不解颜徒满酌，病非伤肺为忧怀。耻矜学步贻身患，岂慕醒狂蹶祸阶。从此别离长酹酌，洛阳狂狷任推埋。

却过淮阴吊韩信庙

功高自弃汉元臣，遗庙阴森楚水滨。英主任贤增虎翼，假王徼福犯龙鳞。贱能忍耻卑狂少，贵乏怀忠近佞人。徒用千金酬一饭，不知明哲重防身。

却入泗口

洪河一派清淮接，堤草芦花万里秋。烟树寂寥一作苍茫分楚泽，海云明灭满一作见扬州。望深江汉连天远，思起乡间一作关满眼愁。惆怅路岐真一作惟此处，夕阳西没水东流。

重入洛阳东门

商颜重命伊川叟，时事知非入洛人。连野碧流通御苑，满阶一作街秋草过天津。每惭清秩容衰齿，犹有华簪寄病身。驱马独归寻里巷，日斜行处旧红尘。

江南暮春寄家

洛阳城见梅迎雪，鱼口桥逢雪送梅。剑水寺前芳草合，镜湖亭上野花开。江鸿断续翻云去，海燕差池拂水回。想一作料得心知近寒食，潜听喜鹊望归来。

奉酬乐天立秋夕有怀见寄

深夜星汉静，秋风初报凉。阶篁淅沥响，露叶参差光。冰兔半升魄，铜壶微滴一作漏长。薄帷乍飘卷，襟带轻摇飏。此际一作北除昏一作魂梦清，斜月满轩房。屣履步前楹，剑戟森在行。重城宵正分，号鼓互相望。独坐有所思，夫君鸾凤章。天津落星河，一苇安可航。龙泉白玉首，鱼服黄金装。报国未知效，惟鹖徒在梁。裴回顾戎旆，颢气生东方。衰叶满栏草，斑毛盈镜霜。羸牛未脱轭，老马强胜尔，吟君白雪唱，惭愧巴人肠。

山出云

杳霭祥云起，飘飏翠岭新。紫峰开石秀，吐叶间松春。林静翻空少，山明度岭频。回崖时掩鹤，幽涧或随人。姑射朝凝雪，阳台晚伴神。悠悠九霄上，应坐玉京宾。

上党奏庆云见

飞龙久驭宇，真气尚兴云。五色传嘉瑞，千龄表圣君。从风忽萧索，依汉更氛氲。影彻天初霁，光鲜日未曛。表祥近一作来自远，

垂化聚还分。宁作无依者，空传陶令文。

华山庆云见

圣主祠名岳，高峰发庆云。金柯初缭绕，玉叶渐氛氲。气公含珠日，晴光吐翠雾氛。依稀来鹤态，仿佛列山群。万树流光影，千潭写锦文。苍生欣有望，祥瑞在吾君。

欲到西陵寄王行周

西陵沙岸回流急，西陵渡在萧山县西二十里，钱王以陵非吉语，改曰西兴。船底粘沙去岸遥。驿吏递呼催下缆，棹郎闲立道齐桡。犹瞻伍相青山庙，卢文辅伍子胥祠铭曰：“汉史胥山，今名青山，谬也。未见双童白鹤桥。欲责舟人无次长，自知贪酒过春潮。

华 顶

欲向仙峰炼九丹，独瞻华顶礼仙坛。石标琪树凌空碧，水挂银河映月寒。天外鹤声随降节，洞中云气隐琅玕。浮生未有从师地，空诵仙经想羽翰。见《天台胜迹录》。

赠毛仙翁

忆昔我祖神仙主，玄元皇帝周柱史。会师轩黄友尧汤，混迹和光佐周武。周之天子无仙气，成武康昭都督尔。穆王粗识神仙事，八极轮蹄方逞志。鹤发韬真世不知，日月星辰几回死。金鼎作丹丹化碧，三万六千神入宅。仙兄受术几千年，已是当时驾鸿客。海光悠容天路长，春风玉女开宫院。紫笔亲教书姓名，玉皇诏刻青金简。桂窗一别三千春，秦妃镜里娥眉新。忽控香虬天上去，海隅劫石膏花尘。一从仙驾辞中土，顽日昏风老无主。九州争奔无时休，八骏垂头避豺一作狼虎。我亦玄元千世孙，眼穿望断苍烟根。花麟白凤竟冥寞，飞春走月劳神昏。百年命促奔马疾，愁肠盘结心摧碎。今

朝稽首拜仙兄，愿赠丹砂化秋骨。

和晋公三首

凤仪常欲附，蚊力自知微。愿假樽罍末，膺门自此依。

貂蝉公独步，鸳鹭我同群。插羽先飞酒，交锋便著文。

穷阴初莽苍，离思渐氛氲。残雪午桥岸，斜阳伊水滨。

柳二首

陶令门前罨接篱，亚夫营里拂朱旗。人事推移无旧物，年年春至绿垂丝一作丝垂。

千条垂一作杨柳拂金丝，日暖牵风叶学眉。愁见花飞狂一作狂飞不定，还同轻薄五陵儿。

答章孝标

假金方用真金镀，若是真金不镀金。十载长安得一第，何须空腹用高心。来时有金汤镀了之句。

朱槿花

瘴烟长暖无霜雪，槿艳繁花满树红。每叹芳菲四时压，不知开落有春风。

至潭州闻猿

昔陪天上三清客，今作端州万里人。湘浦更闻猿夜啸，断肠无泪可沾巾。

江 亭

瘴江昏雾连天合，欲作家书更断肠。今日病身悲状候，岂能埋骨向炎荒。

红蕉花

红蕉花样炎方识，瘴水溪边色最深。叶满丛深殷似火，不唯烧眼更烧心。

忆汉月

花开花落无时节，春去春来有底凭。燕子不藏雷不蛰，烛烟昏雾暗腾腾。

端州江亭得家书二首

雨中鹳语喧江树，风处蛛丝飏水浔。开拆远书何事喜，数行家信抵千金。

长安别日春风早，岭外今来白露秋。莫道淮南悲木叶，不闻摇落更堪愁。

闻 猿

见说三声巴峡深，此时行者尽沾襟。端州江口连云处，始信哀猿伤客心。

赠韦金吾

自报金吾主禁兵，腰间宝剑重横行。接舆也是狂歌客，更就将军乞一声。

长门怨

宫殿沈沈晓欲分，昭阳更漏不堪闻。珊瑚枕上千行泪，不是思君是恨君。

龟山寺鱼池

汲水添池活白莲，十千髻髻尽生天。凡庸不识慈悲意，自葬江鱼入九泉。

剃发多缘是代耕，好闻人死恶人生。只圆说法无高下，尔辈何劳尚世情。

鲍溶诗选

鲍溶，字德源，元和进士第，与韩愈、李正封、孟郊友善。集五卷，今编诗三卷。

古意一作怨诗

女萝寄青松一作松柏，绿一作丝蔓花绵绵。三五定君婚，结发早移天。肃肃羔一作羊雁礼，泠泠琴瑟篇。恭承采繁祀，敢效同车一作居贤。皎日不留景，良辰一作时如逝川。愁一作秋心忽一作还移爱，花一作春貌无归妍。翠袖皓珠一作洗朱粉，碧阶封绿钱。新人易如玉，废瑟难为弦。寄谢一作美舜华木，荣君香阁一作閤前。岂无摇落苦，贵与根蒂连。希君旧光景，照妾薄暮年。

萧史图歌

霜绡数幅八月天，彩龙引凤堂堂然。小载萧仙穆公女，随仙上归玉

京去。仙路迢遥烟几重，女衣清静云三素。胡髻氍毹云髻一作蟾光，翠蕤皎洁琼华凉。露痕烟迹渍红一作清江貌，疑别秦宫初断肠。此天一作去每在西北一作北斗上，紫霄洞客晓烟一作相望。

会仙歌

轻轻濛濛，龙言凤语何从容，耳有响兮目无踪。杳杳默默，花张锦织，王母初自昆仑来，茅盈王方平在侧。青毛仙鸟衔锦符，谨上阿一本有母字环起居王母书。始知仙事亦多故，一隔绛一作银河千岁一作东海千年馀。详一作祥玉字，多喜气，瑶台明月来堕地。冠剑低昂蹈舞频，礼容尽若君臣事。愿言小仙艺，姓名许飞琼，洞阴玉磬敲天声。乐王母，一送玉杯长命酒。碧花醉，灵扬扬，笑赐二子长生方。二子未及伸拜谢，苍苍上兮皇皇下。

李夫人歌

叮闺羽帐华烛陈，方士夜降夫人神。葳蕤半露芙蓉色，窈窕将期环珮身。丽如三五月，可望难亲近。嚬黛含犀一作凄竟一作翠黛含颦意不言，春思秋怨谁能问。欲求巧笑如生时，歌尘在空瑟衔丝。神来未及梦相见一作及梦相见苦，帝比初亡心更悲。爱之欲其生又死，东流一作方万

水殿采菱歌

宫鸦叫赤光，潮声入宫宫影凉。火华啼露卷横塘，金堤四合宛柔扬一作垂杨。美人荷裙芙蓉妆，柔一本此字缺萸紫雾棹龙航。采莲一声歌态长，青丝结眼捕鸳鸯。

周先生画洞庭歌

江南客，水为乡，舟为宅，能以笔锋知地脉。闲分楚水入丹青，不下此堂临洞庭。水文不浪烟不动，木末棱棱山碧重。帝子应哀窈窕